



CENTRALE BANK VAN ARUBA

BCA a hisa e tasa di reserva obligatorio cu 0,5 punto di porcentahe entrante 1 di januari 2023.

Relato di prensa


Conforme e tarea di e Comité di Maneho Monetario (CMM) pa evalua, dirigi y duna transparencia riba e accionnan di maneho monetario di Banco Central di Aruba (BCA), BCA ta informa lo siguiente. Durante e reunion di 16 di december 2022, CMM a dicidi pa hisa e tasa di reserva obligatorio cu 0,5 punto di porcentahe pa 25,5 porciento entrante 1 di januari 2023. Di e manera aki, e banconan comercial mester tene un balansa minimo na BCA cu ta igual na 25,5 porciento di e depositonan riba termino cortico di nan clientenan. E decision pa subi e tasa di reserva obligatorio cu 0,5 punto di porcentahe ta basa primordialmente riba e nivel amplio di likides excesivo na e banconan comercial cu ta persisti ariba nivel pre-pandemico, y e bahada den rapidéz cu e nivel di likides excesivo ta disminuyendo cu datonan preliminar di november 2022 atrobe registrando un subida. E subida di 0,5 punto di porcentahe den reserva obligatorio tin como meta pa sigura un bahada gradual di likides excesivo na e banconan comercial, pero CBA ta determina pa, basa riba desaroyo den nivel di likides den lunanan cu ta bin, pa un bes mas hisa e incremento, si ta considera esaki necesario.

E CMM a considera e siguiente informacion y analisis den su deliberacion:

Reservanan internacional y oficial

E reservanan internacional, cu ta consisti di reservanan oficial di BCA y reservanan di divisa na e banconan comercial a subi cu Afl. 68,4 miyon (Grafico 1) te cu 18 di november 2022, compara cu fin di december 2021. E reservanan oficial a baha cu Afl. 1,3 miyon, mientras cu e reservanan teni pa banconan comercial a subi cu Afl. 69,7 miyon. Consecuentemente, te cu 18 di november 2022, e reservanan oficial y internacional a suma Afl. 2.743,6 miyon y Afl. 3.198,0 miyon, respectivamente.

Sostene un nivel adecua di reservanan ta critico pa mantene e tasa di cambio fiho entre e florin Arubano y e dollar Mericano. Teniendo cuenta cu esaki, BCA ta anticipa cu e reservanan internacional lo keda ampliamente riba e rekisito di tres luna di pago riba e cuenta corriente di e balansa di pago. E pagonan riba e cuenta corriente di e balansa di pago ta consisti, entre otro, di pagonan pa importacion, pagonan di interes na inversionistanan stranhero y transferencianan pa exterior manera placa manda afo door di trahadonan stranhero. Ta proyecta cu e reservanan oficial lo keda dentro di e margen aceptabel basa riba e metrico 'Assessing Reserve Adequacy' (ARA) di e Fondo Monetario Internacional (FMI) (Tabel 1).



Tabel 1: Metriconan relata na reseranan observa den 2022

	jan	feb	mar	apr	mei	jun	jul	aug	sep	okt
Cobertura di pagonan riba cuenta coriente ¹	8,8	8,7	9,4	9,3	9,2	8,8	8,8	8,4	7,8	7,5
Metrico di FMI ARA ²	110,9	110,2	123,7	120,9	121,4	118,8	128,9	127,2	116,9	112,8

¹ E cantidad di luna di pagonan riba cuenta coriente cu e reseranan internacional ta cubri.

² E proporcion entre e nivel di reseranan oficial y e nivel minimo adecua (conforme FMI), den porcentonan.


Inflacion

Na october 2022, e Indice di Prijs di Consumo (IPC) a subi cu 7,0 por ciento compara cu e mesun luna di e aña anterior (Grafico 2), igual na final di september 2022. E aumento aki tabata causa door di e crecimiento den prijs di utilidad, cu a afecta e componente di ‘vivienda’ (contribuyendo cu 2,9 punto di porcentahe). Tambe e prijs di gasoline a aumenta, cu na su turno ta impacta e componente di ‘transporte’ (contribuyendo cu 1,6 punto di porcentahe) y e componente ‘cuminda y bebida no alcoholico’ (contribuyendo cu 1,4 punto di porcentahe).

E inflacion midi riba promedio di 12 luna a subi di 4.3 por ciento te na 5,1 por ciento. BCA ta estima cu e preshon inflacionario eleva lo persisti durante e resto di 2022, debi na e nivel eleva di prijs di petroleo riba mercadonan internacional y e ahustenan recien den prijs di awa y coriente. Ademá, BCA ta premira cu Aruba lo importa un gran parti di e aumentonan den prijs for di su partnernan di exportacion, particularmente Estados Unidos y Europa.


Na october 2022, inflacion basico (excluyendo cuminda y energia) a accelera for di 2.4 por ciento pa 2,7 por ciento si midi e final di respectivo luna contra e mes un luna di e aña anterior. Basa riba un promedio anual, inflacion basico a yega na 2,1 por ciento, un siboda for di 1.9 por ciento na fin di october 2022.

Grafico 2. Inflacion basa riba e indice di prijs di consumo di Aruba
(Fuente: CBS, oktober 2022)



Likides excesivo na banconan comercial

E total di likides excesivo na e banconan comercial a baha di Afl. 1.320,5 milyon na december 2021 te na Afl. 778,3 milyon na oktober 2022 (Grafico 3). E caida den likides excesivo ta debi principalmente na e subidanan consecutivo den e tasa di reserva obligatorio durante e periodo di januari 2022 te cu juli 2022. Na october 2022 likides excesivo a sigui baha, sin embargo menos liher. Es mas, datos semanal pa november 2022 ta registra un aumento den likides excesivo. Ademá, e nivel di likides excesivo a keda mas halto cu e nivelnan prome cu e pandemia na februari 2020 (+Afl. 89,2 milyon). E nivel halto di likides excesivo tabata causa pa e nivel abou di demanda pa credito, e recuperacion den e sector di turismo y e aumento adicional den deposito.



Banco Central di Aruba

15 di februari 2023